

U ovom broju, između ostalog, čitajte:

- **UPFBiH organizovalo sastanak premijera sa gradonačelnicima, načelnicima i privrednicima poplavljenih područja**
- **Održana sjednica UO UPFBiH**
- **Predstavnici UPFBiH, Elektroprivrede BiH i Obrtničke komore FBiH razgovarali o ugovaranju tržišnog snabdijevanja električnom energijom za 2025. godinu**
- **Održana Prva konferencija o trgovini**
- **UPFBiH oštro reagira na populističke izjave o uključivanju pauze u radno vrijeme**
- **Održana sjednica UO Udruženja poslodavaca Kantona Sarajevo**

UPFBiH organizovalo sastanak premijera sa gradonačelnicima, načelnicima i privrednicima poplavljenih područja



Premijer Federacije Bosne i Hercegovine Nermin Nikšić je, nakon radnog sastanka u organizaciji Udruženja poslodavaca FBiH sa gradonačelnicima, načelnicima i privrednicima poplavljenih područja 29.11.2024. godine u Konjicu, izjavio da su imali priliku da razgovaraju sa dijelom poslodavaca čije je poslovanje ugroženo i onemogućeno posljednjim prirodnim nesrećama.

- Imali smo priliku da razgovaramo sa načelnicima i gradonačelnicima. Moram izraziti zadovoljstvo razumijevanjem koje pokazuju poslodavci za situaciju u kojoj se nalazimo. Naravno, Vlada Federacije BiH, osim priče o poslodavcima, mora voditi računa i o drugim stvarima i o zbrinjavanju onih stradalnika koji u ovom trenutku imaju ugrožen, ili nemaju krov nad glavom. Moramo voditi računa o uspostavljanju infrastrukture, što je opet direktno vezano i za poslodavce. Ali svakako, bez poslodavaca, bez stvaranja uslova da oni rade, bez osiguranja prostora da građani rade, iluzorno je očekivati da se vraćamo na neke grane i da budžet onda može da rješava to neograničeno - kazao je premijer Nikšić.

Prema njegovim riječima, da bi budžet funkcionisao, privreda mora da radi i zbog toga je važno i stvaranje pretpostavki za rad privrede.

- Kada je u pitanju budžet, ovo je najgori period, jer je kraj godine kad su budžeti uglavnom

potrošeni i usmjereni već u neke stvari - naveo je premijer Nikšić.

Istakao je da će Vlada Federacije BiH, u okviru mogućnosti koje ima u postojećem Budžetu, nastojati da preraspodijeli sredstva.

- Naravno, to neće biti ni blizu toga koliko je potrebno privredi i privrednicima, zbog čega ćemo u narednoj godini u budžetu planirati nešto značajnija sredstva za ove općine koje su pogođene prirodnom katastrofom, prirodnom nesrećom, kako bi mogli da radimo i na rješavanju infrastructure. A ponavljam, posebno ono što jeste bila današnja tema je da pomognemo poslodavcima - zaključio je premijer Nikšić.



Predsjednik Udruženja poslodavaca FBiH Adnan Smailbegović je izjavio da je njihov fokus definitivno na privredi.

- Danas smo i došli ovdje zbog privrednika. Čuli smo da su te direktne štete nekih 30-tak miliona maraka. To se radi isključivo o direktnim štetama u ovih nekoliko općina i gradova

koje su pogođene. Indirektne štete su značajno veće, puno veće. Nismo pravili prevelik pritisak zato što je ipak fokus bio prvo na zbrinjavanju stanovništva, na tim aktivnostima. Sada mislimo da se mora pomoći da se vrate proizvodnja i da se vrate radna mjesta - kazao je Smailbegović.

Po njegovim riječima, vrlo je važno da ljudi nastave da rade poslove koje su radili prije kako bi mogli normalno da žive, da zarađuju sebi za život.

- Čuli smo od premijera neke informacije. Ovdje je važno bilo da razmijenimo informacije s jedne i s druge strane, da pokušamo nekim idejama da napravimo neki iskorak. Mislim da treba ovo sve skupa raditi relativno brzo, nemamo previše vremena da se gubi. Moramo napraviti dodatni pritisak da se vrate radna mjesta, da kompanije počnu da rade, da im se pomogne, da se ubrizga novac, da nastavimo normalan život - zaključio je Smailbegović.

Navedene stavove premijera Vlade FBiH i predsjednika UPFBiH potvrdili su i predstavnici privrednika koji su posebno ukazali na važnost brzog interveniranja i uključivanja institucija vlasti ali i sistema osiguranja i banaka, te raspoloživih domaćih i međunarodnih budžetskih i drugih fondova u cilju sanacije ali prije svega što skorije pokretanje rada kompanija koje još uvijek nisu u mogućnosti pokrenuti radne procese nakon poplava.

Tokom sastanka prezentirane se i određene preporuke koje mogu poslužiti Vladi FBiH za realizaciju zaključaka sa sjednice ZD PFBiH održanoj 27.11.2024. godine kojom prilikom je Vlada zadužena da hitno izradi plan podrške privrednim subjektima i poljoprivrednicima pogođenim poplavama.



Vanredna sjednica
Zastupničkog doma
Federalnog parlamenta,


posvećena posljedicama poplava i klizišta što su zadesili pojedina područja Bosne i Hercegovine odnosno Federacije BiH 4. oktobra, završena je usvajanjem 17 zaključaka.

1. Zadužuje se Vlada Federacije BiH da hitno pristupi sanaciji magistralnih cesta, putne i druge infrastrukture u svim područjima pogođenim poplavama dana 04.10.2024. godine. Zadužuje se Vlada Federacije BiH da do kraja godine završi sanaciju željezničke pruge;

Pomoć stanovništvu pogođenom poplavama

2. Zadužuje se Vlada Federacije BiH da nastavi osiguravati materijalnu i svaku drugu pomoć stanovništvu pogođenom poplavama uključujući smještaj, hranu, vodu, lijekove i svu drugu neophodnu pomoć;

3. Zadužuje se Vlada Federacije BiH da u skladu sa svojim mogućnostima osigura finansijska i druga sredstva za obnovu područja pogođenih poplavama. Sredstva će se osigurati iz Budžeta Federacije BiH, međunarodnih fondova, donacija i drugih dostupnih izvora u skladu sa važećim pravnim propisima;



4. Zadužuje se Vlada Federacije BiH da uspostavi koordinaciju na svim nivoima vlasti (državnim, kantonalnim i općinskim institucijama) kao i saradnju sa međunarodnim i nevladinim sektorom radi ubrzane provedbe svih mjera sanacije i obnove područja pogođenih poplavama;

5. Zadužuje se Vlada Federacije BiH da redovno i pravovremeno pred svaku redovnu sjednicu Predstavničkog doma dostavi informaciju o poduzetim i planiranim mjerama, aktivnostima te postignutim rezultatima u sanaciji i obnovi područja pogođenih poplavama;

6. Također, pozivaju se međunarodne institucije da u koordinaciji sa Vladom Federacije BiH kroz donaciju finansijskih sredstava u vremenskom periodu tokom obnove poplavljenih područja doprinesu što bržem i efikasnijem realiziranju aktivnosti sanacije nastalih šteta;

7. Zadužuje se Vlada Federacije BiH da u saradnji sa telekom operaterima u većinskom vlasništvu Federacije BiH poduzme aktivnosti na uspostavi CELL BROADCAST sistema uzbunjivanja u slučaju prirodnih katastrofa i drugih vanrednih situacija s ciljem pravovremenog uzbunjivanja i zaštite stanovništva;

8. Zadužuje se Vlada Federacije BiH da donese novu Procjenu ugroženosti od prirodnih i drugih nesreća i novi Plan zaštite i spašavanja od prirodnih i drugih nesreća za područje Federacije Bosne i Hercegovine;

9. Zadužuje se Vlada Federacije BiH da poduzme aktivnosti kako bi se utvrdila nova Jedinstvena metodologija za procjenu šteta od prirodnih i drugih nesreća u Federaciji Bosne i Hercegovine;

Izvještaj o kamenolomima

10. Zadužuje se Vlada Federacije BiH da obezbijedi neophodna sredstva za realizaciju završne faze infrastrukturnog projekta Odjela B Ustanove za socijalno zbrinjavanje i zdravstvenu njegu Drin,i Ustanove Bakovići, kao i svih ostalih ustanova iz ove oblasti s ciljem adekvatnog zbrinjavanja štíćenika ovih ustanova nakon elementarne nepogode.

11. Zadužuje se Vlada Federacije BiH da što hitnije dostavi prijedlog Zakona o šumama shodno

Ustavom propisanim nadležnostima Parlamentu FBiH radi razmatranja i usvajanja.

12. Obavezuje se Vlada Federacije BiH da na osnovu podataka prikupljenih od nadležnih ministarstva, Predstavničkom domu FBiH dostavi Izvještaj o kamenolomima preko i ispod površine od 2,5 hektara u Federaciji BiH koji su prestali sa radom, a posebno za sporni kamenolom iznad Donje Jablanice, te da se taksativno navede da li su ili nisu ispunili zakonsku obavezu rekultivacije i remedijacije u skladu sa zakonskim propisima. Izvještajem je potrebno obuhvatiti i mjere koje su poduzete u slučajevima neispunjavanja uslova te kada se očekuje njihovo rješavanje.

13. Zadužuje se Vlada Federacije BiH da hitno izradi Plan podrške privrednim subjektima i poljoprivrednicima pogođenim poplavama. Ovaj Plan treba da uključi: lokacije za provedene subjekte pogođene poplavama kao što su poreske olakšice, odgode u plaćanju doprinosa i drugih obaveza, subvencije za obnovu oštećene imovine, subvencije ili povoljne kreditne linije za poljoprivrednike kojima su uništene obradive površine i usjevi, kako bi se omogućio što brži povratak na rad i oporavak poljoprivredne proizvodnje, te kreiranje posebnog programa za sufinansiranje obnove i izgradnje poljoprivredne infrastrukture kao što su sistemi za navodnjavanje i zaštitu od poplava.

14. Zadužuje se Vlada Federacije BiH da u roku od 15 dana sačini detaljan izvještaj o broju evakuisanih domaćinstava odnosno stanovnika.

15. Zadužuje se Federalni zavod za geologiju da što hitnije, a najkasnije do kraja godine dostavi Izvještaj o sigurnosti poplavljenih naseljenih mjesta iz najteže pogođenih općina.

16. Zadužuje se Vlada FBiH da hitno reaktivira Federalni centar za obuku struktura zaštite spašavanja na način da hitno provede procedure imenovanja rukovodilaca te stručnih i odgovornih ljudi čija će obaveza biti provođenje poslova i zadataka definisanih članovima 164., 166. i 167. Zakona o zaštiti i spašavanju ljudi i materijalnih dobara od prirodnih i drugih nesreća kao i ostalih aktivnosti iz djelokruga definisanih obaveza ovog centra.

17. Zadužuje se Vlada FBiH da hitno reaktivira inspektorat FUCZ na način da imenuje glavnog federalnog inspektora kao i ostalih inspektora čija će obaveza biti implementacija Zakona o zaštiti i spašavanju ljudi i materijalnih dobara od prirodnih i drugih nesreća, po vertikali od Federacije preko kantona, do jedinica lokalne samouprave, inspekcijskih poslova kao i primjena krivičnih odredbi definisanih ovim zakonom.

Održana sjednica Upravnog odbora UPFBiH



Na sjednici Upravnog odbora Udruženja poslodavaca u FBiH, održanoj 29. novembra 2024. godine, predsjednik UO Adnan Smailbegović informisao je članove o aktivnostima po pitanju fiskalnih zakona. Istakao je da Udruženje smatra da je tekst Nacrt zakona o fiskalizaciji finansijskih transakcija poprilično zadovoljavajući, ali da će UPFBiH oformiti tim koji će pripremiti konkretne primjedbe i sugestije u cilju unapređenja Zakona.

Ono što je sporno je Zakon o dopunama Zakona o porezu na dohodak koji je Vlade FBiH uputila u parlamentarnu proceduru po skraćenom postupku, a zatim je Vlada FBiH tražila odgodu sjednice na kojoj se trebao razmatrati ovaj zakon radi usaglašavanja istog. Predsjednik UO je naveo da je Udruženje reagovalo na predloženu dopunu Zakona te da Udruženje nije podržalo ovakva rješenja. Kazao je da Udruženje pripremila i Vladi uputilo tekst dopune Zakona koji umnogome unapređuje ponuđenja rješenja, a koji podrazumijeva da neoporezivi dio bude do 450 KM mjesečno u odnosu na plaću za novembar te da umjesto parametra radni učinak se koristi termin nagrađivanje jer nije u sukobu sa trenutnim važećim propisima.

Članovi su podržali aktivnosti Udruženja po pitanju fiskalnih zakona.

U nastavku sjednice, imenovani su pregovarački timova za vođenje pregovora i zaključivanje izmjena i dopuna kolektivnih ugovora za djelatnost tekstilne, kožarsko prerađivačke, gumarske i industrije obuće, drvne i papirne industrije, građevinarstva, hemije i nemetala, cestovnog saobraćaja i trgovine. Također, data je ovlast rukovodstvu UPFBiH da imenuje predstavnika u

sastav Savjeta za razvoj trgovine u FBiH čije osnivanje predviđa novousvojeni Zakon o unutrašnjoj trgovini.


Predsjednik UO je obavijestio članove o aktivnostima za završnu godišnju konferenciju UPFBiH koja će se održati 09. decembra 2024. godine u Sarajevu. Cilj konferencije je analiza stanja i ocjena poslovnog okruženja u FBiH, odnosno Bosni i Hercegovini te procjena ključnih aktivnosti za poslovanje u narednoj godini kako na domaćem tako i na EU tržištu. Rukovodstvo UPFBiH pozvali su članove da prisustvuju i doprinesu ovako značajnom događaju koji će se održati na visokom nivou.

Pod tekućim pitanjima članovi su raspravljali o električnoj energiji. Rukovodstvo UPFBiH obavijestilo je članove da je održano više sastanaka sa predstavnicima Elektroprivrede BiH te da je dogovoreno da predstavnici EPBiH dostave jasnu informaciju o rezultatima sastanaka kako bi UPFBiH moglo obavijestiti svoje članice o istom. Međutim, EPBiH još uvijek nije dostavila istu te je zaključeno da će UPFBiH uputiti urgenciju sa zahtjevom za hitno dostavljanje informacije.

Predstavnici UPFBiH, Elektroprivrede BiH i Obrtničke komore FBiH razgovarali o ugovaranju tržišnog snabdijevanja električnom energijom za 2025. godinu

Izvršni direktor za snabdijevanje i trgovinu Javnog preduzeća Elektroprivreda Bosne i Hercegovine d.d. - Sarajevo Nevad Ikanović, razgovarao je s predstavnicima Udruženja poslodavaca u Federaciji Bosne i Hercegovine i predstavnicima Obrtničke komore Federacije Bosne i Hercegovine o ugovaranju tržišnog snabdijevanja električnom energijom za 2025. godinu, uključujući ugovaranje tržišnog snabdijevanja za mjerna mjesta na niskom naponu kupaca koji su u skladu s novim Zakonom o električnoj energiji Federacije Bosne i Hercegovine („Službene novine Federacije BiH”, broj: 60/23) i podzakonskim propisima od 01.09.2024. godine ostali bez prava na snabdijevanje električnom energijom u okviru javne usluge.

Prethodno se ne odnosi na kupce iz kategorije domaćinstva, kao ni na listu malih kupaca i listu kupaca od posebnog društvenog značaja koje je utvrdio Operator distributivnog sistema Javnog preduzeća Elektroprivreda Bosne i Hercegovine d.d. - Sarajevo, čiji se status neće promijeniti i koji zadržavaju pravo na korištenje javne usluge snabdijevanja električnom energijom.



Javno preduzeće Elektroprivreda Bosne i Hercegovine d.d. - Sarajevo, u skladu sa Zakonom o električnoj energiji Federacije BiH, u mjesecu novembru započela je obavještanje kupaca o isteku ugovora o snabdijevanju električnom energijom za tržišno snabdijevanje zaključenih za 2024. godinu, putem dopisa.

Uz obavještenje o isteku ugovora o snabdijevanju električnom energijom za tržišno snabdijevanje za 2024. godinu, Javno preduzeće Elektroprivreda Bosne i Hercegovine d.d. - Sarajevo kupcima nudi nove ugovore o snabdijevanju električnom energijom za tržišno snabdijevanje za 2025. godinu, uvrštavajući u iste i mjerna mjesta koja su od 01.09.2024. godine prešla sa javne usluge snabdijevanja na tržišno snabdijevanje električnom energijom a zbog gubitka prava na javnu uslugu snabdijevanja, u skladu sa zakonskim i podzakonskim propisima.

Ukupan broj kupaca koji se snabdijevaju električnom energijom u okviru tržišnog snabdijevanja je približno 3110. Prethodno je u periodu juni-august za dio 2025. godine ugovore za tržišno snabdijevanje sa Javnim preduzećem Elektroprivreda Bosne i Hercegovine d.d. - Sarajevo potpisalo oko 2300 kupaca ili 74% od ukupnog broja kupaca na tržišnom snabdijevanju. Trenutno je predmetom ugovaranja tržišnog snabdijevanja za 2025. godinu oko 810 kupaca ili 26% od ukupnog broja kupaca u okviru tržišnog snabdijevanja.

Prema projekcijama, manje od 15% kupaca koji su trenutno predmetom ugovaranja tržišnog snabdijevanja će u 2025. godini imati povećanje ukupnih troškova (bez PDV-a) za električnu energiju veće od 20% u odnosu na tržišne uvjete iz 2024. godine, pri čemu se radi o kupcima koji pored mjernih mjesta na srednjem/visokom naponu imaju potrošnju na niskom naponu na mjernim mjestima za koja su izgubili pravo na javnu uslugu snabdijevanja počevši od 01.09.2024. godine.

Oko 40 kupaca (cca 5% od ovih kupaca) će u 2025. godini imati povećanje ukupnih troškova za električnu energiju (bez PDV-a) veće od 30% u odnosu na tržišne uvjete iz 2024. godine, a manje od 5 kupaca (manje od 0.5%) će imati povećanje ukupnih troškova između 50 i 60% u odnosu na tržišne uvjete iz 2024. godine.

Generalno, više od 40% novih kupaca na tržišnom snabdijevanju, a koji su ranije zbog gubitka prava na javnu uslugu snabdijevanja u skladu s novim Zakonom o električnoj energiji Federacije BiH, zaključili ugovore o tržišnom snabdijevanju za period koji obuhvata i dio 2025. godine će za dati dio 2025. godine imati povećanje troška za električnu energiju (bez PDV-a)

manje od 30%, pri čemu će neki kupci imati i smanjenje ukupnog troška, a što u prvom redu ovisi o omjeru potrošnje električne energije u periodima veće i manje dnevne tarife te načina korištenja vršnog opterećenja. Oko 165 kupaca (cca 7%) predmetnih kupaca će za dio 2025. godine imati povećanje troška za električnu energiju (bez PDV-a) veće od 50%.

Prema projekcijama povećanje troška za električnu energiju (bez PDV-a) za 2025. godinu do 10% u odnosu na 2024. godinu će imati oko 800 kupaca ili 26% od ukupnog broja kupaca na tržišnom snabdijevanju. U rasponu 10-20% povećanje troška za električnu energiju (bez PDV-a) za 2025. godinu će imati oko 290 kupaca ili 9% od ukupnog broja kupaca na tržišnom snabdijevanju. U rasponu 20-30% povećanje troška za električnu energiju (bez PDV-a) za 2025. godinu će imati oko 660 kupaca ili 21% od ukupnog broja kupaca na tržišnom snabdijevanju. U rasponu 30-40% povećanje troška za električnu energiju (bez PDV-a) za 2025. godinu će imati oko 825 kupaca ili 27% od ukupnog broja kupaca na tržišnom snabdijevanju. Povećanje troška za električnu energiju (bez PDV-a) veće od 40% za 2025. godinu veće od 40% će imati 530 kupaca ili 17% od ukupnog broja kupaca na tržišnom snabdijevanju.

Javno preduzeće Elektroprivreda Bosne i Hercegovine d.d. - Sarajevo poziva kupce kojima ugovori o snabdijevanju električnom energijom za tržišno snabdijevanje ističu zaključno sa 31.12.2024. godine na pravovremeno zaključivanje novih ugovora o tržišnom snabdijevanju, imajući u vidu da je novim Zakonom o električnoj energiji Federacije Bosne i Hercegovine propisano da je snabdjevač dužan najkasnije tri dana prije početka snabdijevanja krajnjeg kupca nadležnom operatoru sistema prijaviti ugovor, odnosno svaku promjenu ugovora i dostaviti podatke o krajnjem kupcu, mjestima primopredaje, vrsti ugovora i periodu snabdijevanja.

Također, treba voditi računa da u slučaju promjene snabdjevača na tržištu postupak promjene snabdjevača traje do 21 dan.

U slučaju da kupac pravovremeno ne odabere snabdjevača na tržištu električne energije, u skladu sa Zakonom o električnoj energiji Federacije Bosne i Hercegovine ima pravo na korištenje usluge rezervnog snabdjevača u periodu do 90 dana, za koju svrhu je neophodno potpisati ugovor o rezervnom snabdijevanju najkasnije u roku od osam dana od dana početka rezervnog snabdijevanja. Ukoliko krajnji kupac ne zaključi ugovor za rezervno snabdijevanje u roku od osam dana od dana prijema ugovora operator sistema vrši obustavu isporuke električne energije na zahtjev rezervnog snabdjevača, a krajnji kupac je dužan da plati preuzetu električnu energiju.

Zakon o unutrašnjoj trgovini: Korak ka modernizaciji i usklađivanju oblasti trgovine



Povodom usvojenog Zakona o unutrašnjoj trgovini na Domu naroda Parlamenta FBiH, Udruženje poslodavaca FBiH izražava svoje zadovoljstvo načinom pripreme i usaglašavanja ovog Zakona kroz veoma intenzivan ekonomsko-socijalni dijalog koji je vođen u okviru uspostavljene Radne grupe, sastavljene od predstavnika vlasti, Sindikata radnika trgovine i uslužnih djelatnosti STBiH, reprezentativnog Udruženja poslodavaca FBiH i Udruženja potrošača.

Usvojeni zakon odraz je usaglašanih interesa i kompromisa svih aktera na koje se zakon odnosi.

Iako je najviše interesa u javnosti izazvala odredba koja prodajne objekte nedjeljom proglašava zatvorenim, Udruženje poslodavaca FBiH ističe značaj i drugih odredbi Zakona koje se fokusiraju na modernizaciju i usklađivanje trgovinske oblasti s europskim i drugim standardima. Ovo uključuje precizno definiranje pojma trgovca i trgovačke djelatnosti, obaveze trgovaca, uvođenje savremenih klasifikacija i nomenklature, detaljno uređenje internet prodaje, te načine formiranja i isticanja maloprodajnih cijena, kao i regulaciju inspekcijskog nadzora i postupanje inspektora.

Kako bi se osigurala što bolja pripremljenost za primjenu Zakona, Udruženje poslodavaca FBiH najavilo je održavanje operativnog zajedničkog sastanka sa predstavnicima vlasti, prije stupanja na snagu Zakona, a sa ciljem usklađivanja s novim odredbama. Zakon o unutrašnjoj trgovini prvi je u nizu zakona iz oblasti trgovine, a uskoro se pokreće zajednički rad i na Zakonu o e-trgovini, Zakonu o zaštiti potrošača i Zakonu o kontroli cijena.

Objavljen Zakon o unutrašnjoj trgovini FBiH




U Službenim novinama Federacije BiH, broj: 87/24, od 6.11.2024. godine objavljen je [Zakon o unutrašnjoj trgovini](#).

S ciljem difinisanja određenih pojašnjenja i dogovora oko početka primjene Zakona, predstavnici Udruženja poslodavaca u FBiH su zakazali sastanak sa ministrom trgovine i direktoricom Federalne uprave za inspekcijske poslove Ivanom Prvulović.

Poslodavci održali sastanak sa ministrom trgovine



Federalni ministar trgovine Amir Hasičević održao je u sjedištu Vlade Federacije BiH u Sarajevu, sastanak sa v.d. direktoricom Federalne uprave za inspekcijske poslove Ivanom Prvulović i predstavnicima Udruženja poslodavaca u FBiH povodom primjene Zakona o unutrašnjoj trgovini.



Ministar Hasičević je u izjavama za predstavnike medija nakon sastanka kazao da će prva neradna nedjelja u sektoru trgovine u Federaciji BiH biti 17. novembra. Istakao je da ne očekuje da će ta mjera dovesti do porasta broja dragstora u Federaciji BiH i drugih zloupotreba. Dodao je da su istraživanja pokazala da se navike potrošača prilagode u roku tri do četiri sedmice od početka primjene takve mjere i da ne dolazi do pada prometa trgovaca.

"Na stranici Federalnog ministarstva je objavljen Vodič kroz Zakon gdje se svakodnevno odgovara na pitanja građana i trgovaca", rekao je Hasičević.

Po pitanju rada dragstora, on je rekao da oni moraju raditi 24 sata i da ne mogu raditi selektivno radno vrijeme.

"Što se tiče ugostitelja, oni nisu obuhvaćeni zakonom. U trgovačkim centrima moći će raditi oni objekti koji se ne bave trgovinom, poput kina, kafića", kaže Amir Hasičević.

Hasičević je istekao da je u pripremi i novi Zakon o kontroli cijena.

Direktorica Federalne uprave za inspekcijske poslove Ivana Prvulović kaže da je Federalna uprava za inspekcijske poslove spremna za kontrolu zakona o unutrašnjoj trgovini

"Svi aspekti kontrole će biti iscrpljeni tek donošenjem odgovarajućih pravilnika, ali je važno napomenuti da će federalni tržišni inspektorat raditi 17. novembra i kontrolisati da li su zatvoreni prodajni objekti. Imamo dovoljno inspektora na terenu. Kao i uvijek, insistirat ću na preventivnim i korektivnim mehanizmima, ali tamo gdje bude neophodno koristit ćemo i represivne mjere koje podrazumijevaju izdavanje prekršajnih naloga. Kazne se kreću od 2.000 do 15.000 KM", rekla je Prvulović.

Direktor UPFBiH Adnan Smailbegović je naglasio da ovaj model rada koji su poslodavci imali sa Ministarstvom trgovine, treba primjenjivati sa svim ostalim ministarstvima.

"Naporno smo radili i došlo se do rezultata koji je, rekao bih, poprilično optimalan i predstavlja dobro rješenje i za radnike i poslodavce. Ovo je prvi u nizu zakona o trgovini, u fazi izrade su još tri u ovom resoru, a s njima bi sve to trebalo biti zaokruženo. Tu su još Zakon o e-trgovini, Zakon o kontroli cijena i Zakon o zaštiti potrošača", rekao je Smailbegović, te dodao: "Procijenili smo da s neradnom nedjeljom neće doći do pada prometa. Naš stav je bio da to

treba vrijediti za sve na nivou Federacije, već je ta neradna nedjelja bila na snazi u nekim gradovima i općinama i bio nam je interes da to ujednačimo".

Direktor Penny Plus d.o.o Sarajevo Almedin Kadrić zahvalio je svim sudionicima i ministru na metodologiji kojom se došlo do zakona, ali i pozvao javnost da obrate pažnju i na druge članove Zakona.



"Nekako je sva pažnja otišla na taj jedan član Zakona, a propustili smo da je Zakon usklađen sa europskim direktivama i normama koje nas približavaju europskom tržištu. Zakon je prvi put definisao e-trgovinu, elektronsko

poslovanje putem interneta, definisao tri vrste prodavnica: e-shop, elektronska platforma i tzv. dropshipping. Donosi to da je način slanja podataka prema Ministarstvu sada elektronskim putem, izjave koje trgovac radi prilikom otvaranja radnje više ne moraju biti na papiru nego elektronske. Najbitnije, staje se u kraj sivoj ekonomiji. Inspektori do sada nisu mogli kažnjavati nelegalne trgovce, neregistrovane, ovaj zakon to omogućava. Bitna stvar - roba koja se stavlja na tržište sada mora biti identificirana unaprijed, to će pospješiti aspekt sigurnosti, prije svega hrane, ali i svih drugih proizvoda. Ovaj Zakon je u svakom slučaju unapređenje", rekao je Kadrić.

Na pitanje da li će RS profitirati, Kadrić odgovara:

"Neće. Ljudi se za mjesec dana priviknu i boljom organizacijom svog vremena se taj promet, pokazuju istraživanja, preraspodjeli na subotu i nedjelju. Kada je Sarajevo konkretno u pitanju, Istočno Sarajevo već ima ograničen rad nedjeljom. Očekujem da će Sindikat trgovaca RS vrlo brzo izvršiti pritisak na vlasti da uvedu u neradnu nedjelju. Naši radnici su od danas sretni", rekao je Kadrić i dodao da je važno naglasiti da novi Zakon uvodi i QR kod preko kojeg kupci jednostavnim skeniranjem dobivaju sve informacije o proizvodu.

Prva neradna nedjelja 17. novembra



Primjena Zakona o unutrašnjoj trgovini počinje 14. novembra, a prva neradna nedjelja za radnike u trgovinama je 17. novembra.

U „Službenim novinama FBiH“ broj 87/24 od 06.11.2024. godine objavljen je Zakon o unutrašnjoj trgovini FBiH. Ovaj Zakon stupa na snagu osmog dana od dana objavljivanja u „Službenim novinama FBiH“, tj. 14.11.2024. godine.

Radi pojašnjenja u primjeni određenih odredbi Zakona, obavještavamo vas o sljedećem:

Članom 18. Zakona propisano je da radno vrijeme prodajnih objekata određuje trgovac u periodu od ponedjeljka do subote, u ukupnom trajanju do 90 sati sedmično, a koje trgovac samostalno raspoređuje i da su prodajni objekti zatvoreni nedjeljom i u dane praznika.

Nadalje, Zakonom su taksativno navedeni izuzeci od primjene naprijed citirane odredbe.

Članom 131. Zakona, koji se odnosi na donošenje podzakonskih akata u vezi primjene Zakona i dužnost usklađivanja sa podzakonskim aktima, propisano je:

(1) Federalni ministar trgovine će donijeti podzakonske akte na osnovu ovlaštenja iz ovog zakona u roku od šest mjeseci od dana stupanja na snagu ovog zakona.

(2) Trgovci su dužni uskladiti rad i poslovanje u skladu sa ovim zakonom u roku od šest mjeseci od dana stupanja na snagu propisa iz stava (1) ovog člana.

Dakle, kako Zakonom o unutrašnjoj trgovini nije predviđeno donošenje podzakonskih akata u vezi radnog vremena, tj. primjene člana 18. Zakona, tako se odredbe ovog člana počinju primjenjivati idućeg dana od dana stupanja Zakona na snagu, odnosno od 15.11.2024. godine.

PODZAKONSKI AKTI ZAKONA O TRGOVINI

1. Pravilnik o minimalno tehničkim uslovima (već postoji)

2. Izjava o ispunjavanju minimalno tehničkih uslova (već postoji)

3. Pravilnik o klasifikaciji prodavnica i drugih oblika trgovine na malo (već postoji)



4. Pravilnik o načinu obavljanja prodaje na daljinu i elektronske trgovine (novo)

5. Uredba Vlade FBiH o uslovima za organizovanje dražbe, način poslovanja, te postupak prodaje robe putem dražbe (na prijedlog Ministarstva, novo)

6. Pravilnik o Registru trgovačkih radnji i trgovaca pojedinaca (već postoji)

7. Pravilnik o obliku, sadržaju i načinu vođenja trgovačke knjige (već postoji)

8. Pravilnik o periodu izvještavanja, rokovoma za dostavljanje, oblik obrasca i sadržinu podataka o trgovini i trgovinskoj mreži, cijenama, promjeni cijena roba i usluga, zalihama, marži (novo)

9. Pravilnik o postupku dodjele sredstava za unapređenje i razvoj trgovine (novo)

Odgovore na najčešće postavljena pitanja možete pronaći na [LINKU](#).

Održana Prva konferencija o trgovini



Udruženje poslodavaca u FBiH i Federalno ministarstvo trgovine organizovalo je Prvu konferenciju o trgovini koja je okupila predstavnike vlasti, relevantnih institucija, sindikata, akademske zajednice, poslodavce iz oblasti trgovine i druge stručnjake zainteresirane za budućnost trgovine.

Učesnici su razgovarali o tržištu radne snage, te mogućim mehanizmima rješavanja problema nedostatka radne snage u oblasti trgovine, zatim o inspeksijskom nadzoru, kao i unapređenju trgovinskog sektora u Federaciji Bosne i Hercegovine.

Federalni ministar trgovine Amir Hasičević poručio je da je trgovina jedna od važnijih privrednih grana ekonomije Federacije BiH koja broji 7.700 privrednih društava i ostvaruje godišnji prihod u iznosu od 32 milijarde KM, što predstavlja 46 posto ukupnih prihoda u Federaciji BiH. U oblasti trgovine zaposleno je više od 86.000 radnika.





Predsjednik Udruženja poslodavaca FBiH Adnan Smailbegović kazao je kako je partnerski dijalog koji je iniciralo Federalno ministarstvo trgovine na čelu sa ministrom Hasičevićem jedini ispravan put u uređenju određenih oblasti poput trgovine, što je polučilo i prve rezultate, a to je usvajanje Zakona o unutrašnjoj trgovini koji

omogućava modernizaciju trgovine i usklađenost sa EU standardima.

Konferencija je okupila sve zainteresovane strane u procesu reforme ovog sektora kako bi se došlo do kvalitetnih rješenja, što je uspješni model u procesu kreiranja i donošenja zakona i regulisanja cjelokupnog sektora trgovine.

Samir Kurtović je, u ime Saveza samostalnih sindikata BiH, rekao da je ovo dobar način vođenja dijaloga između socijalnih partnera. Cilj tog sindikata, kako je istakao, jeste da zaštiti i poboljša status svih radnika, te da se saradnja nastavi i ubuduće.

Kada je riječ o Zakonu o unutrašnjoj trgovini koji je ovih dana stupio na snagu i među ostalim tretira i pitanje neradne nedjelje za trgovce, ministar Hasičević je rekao da prve informacije sa terena govore da nije bilo velikih i značajnih kršenja odredbi tog zakona.

Direktorica Federalne uprave za inspekcijske poslove Ivana Prvulović u panelu posvećenom inspekcijskom nadzoru kazala je kako je na primjeru kontrole poštivanja Zakona o unutrašnjoj trgovini koji je stupio na snagu 14.11.2024. godine inspekcija pokazala da je dobro organizovana, da



zajedničkim djelovanjem federalnih i kantonalnih inspektora mogu odgovoriti svim zahtjevima.

Prvulović je ocijenila da je prilikom provjere provedbe člana 18. ZUT-a koji se odnose na neradnu nedjelju utvrđeno da je zanemarivo mali broj trgovaca koji nisu poštovali ovaj član Zakona, te da se provjere nastavljaju kontinuirano.

Navela je da inspekcijski nadzor predstavlja ključni nadzorni mehanizam sistema u praćenju stanja u različitim resornim oblastima, pa tako i stanja unutrašnje trgovine, a da je metod neposrednog uvida u poslovanje i postupanje poslovnih subjekata izvor i baza informacija za usmjereno unapređenje regulatornog i zakonodavnog okvira.



Učesnici konferencije govorili su i o tržištu radne snage, te mogućim mehanizmima rješavanja problema nedostatka radne snage u oblasti trgovine.

Razmatrani su modeli susjednih i zemalja EU koji uvoze radnu snagu iz drugih država.

Dok susjedne zemlje u prosjeku imaju oko 100.000 inostranih radnika za određena zanimanja gdje je veliki deficit, u Bosni i Hercegovini zbog dugotrajnih procedura i komplikovanih pravila na dozvolu za rad za jednog radnika iz inostranstva moraju čekati oko devet mjeseci.

Sudionici su zaključili i da predstoji daljnji rad na pripremi tri važna zakona. Nakon stupanja na snagu Zakona o unutrašnjoj trgovini, rekao je direktor Udruženja poslodavaca FBiH Mario Nenadić, predstoji rad na pripremi Zakona o e-trgovini, o Zastiti potrošača, a Zakon o kontroli cijena već je upućen u proceduru i očekuje se skoro usvajanje.

Udruženje poslodavaca u FBiH oštro reagira na populističke izjave o uključivanju pauze u radno vrijeme

Udruženje poslodavaca u FBiH oštro reagira i suprotstavlja se izjavama najviših predstavnika izvršne i zakonodavne vlast vezano za pitanje zakonskog regulisanja uključivanja pauze za odmor u ukupno plaćeno radno vrijeme radnika u FBiH. Zastupničkog doma Parlamenta FBiH Harisa Silajdžića i reagovanje visokih predstavnika izvršne vlasti na iste. Udruženje je uključeno u Radnu grupu za izradu Zakona o



radu i prema zahtjevima rukovodioca ove grupe, odnosno predstavnika Ministarstva za rad i socijalnu politiku FBiH, dogovoreno je da se neće od bilo kojeg socijalnog partnera uključenog u rad na pripremi prednacrtu Zakona javnost obavještavati o principima Zakona niti dijelovima teksta dok se ne pripremi odgovarajuća polazna osnova. Sve drugo bile bi grube špekulacije u cilju populizma.

Prema Direktivi EU o random vremenu, ovo pitanje ostavljeno je državama da samostalno uređuju u skladu sa svojim mogućnostima i interesima, te su različite prakse širom Europe. Bosna i Hercegovina je sigurno po produktivnosti posljednja zemlja koja tako olako treba procjenjivati i donositi ovako složene odluke koje u konačnici povećaju troškova poslovanja, utječu na produktivnosti i stvaraju nerealne obaveze između socijalnih partnera.

Podsjećamo također i na konvenciju Međunarodne organizacije rada kojom se zahtjeva osiguranja tripartitne konsultacije, odnosno konsultacije između vlade, poslodavaca i sindikata, prije nego što se donesu zakonodavne promjene koje se odnose na radne uslove, zapošljavanje, radnu zaštitu i druge slične oblasti.

U vrijeme kada usklađujemo interese vezano za fiskalne i parafiskalne obaveze, povećanje minimalne i drugih plaća radnika te stvaranje boljeg poslovnog ambijenta generalno, nije dobro populističkim izjavama dodatno komplikovati situaciju i zbunjivati javnost.

Zahtijevamo da se ispoštuju međunarodne konvencije, domaći propisi i dogovorene metodologije rada te da sa izjavama za javnost izlazimo nakon što socijalni partneri usglase moguća rješenja i prednacrt zakona.

Održan sastanak predstavnika udruženja poslodavaca FBiH i RS sa šefom Delegacije EU u BiH



Predstavnici Udruženja poslodavaca u FBiH i Unije poslodavaca RS-a održali su 13. novembra 2024. godine sastanak sa novim šefom Delegacije Evropske unije u Bosni i Hercegovini i specijalnim predstavnikom Evropske unije u Bosni i Hercegovini Luigijem Sorecom. Predstavnici udruženja čestitali su preuzimanje nove i izazovne funkcije, iskazali namjeru za uspješnu buduću saradnju te posebno interese za unapređenje procesa vezanih za prilagođavanje bh. privrede tržištu EU.

Predstavnici poslodavačkih organizacija su upoznali ambasadora Sorecu sa strukturnim ekonomsko-socijalnim problemima u Bosni i Hercegovini i ukazali na mogućnosti saradnje u okviru procesa pristupanja Europskoj uniji i realizaciji strateških planskih dokumenata Bosne i Hercegovine i Evropske unije. Ambasador Soreca je predstavnike poslodavačkih organizacija upoznao sa djelovanjem i nastojanjima Delegacije Evropske unije u Bosni i Hercegovini.

Ispred Udruženja poslodavaca u Federaciji Bosne i Hercegovine prisustvovali su predsjednik Adnan Smailbegović i direktor Mario Nenadić, a ispred Unije poslodavaca Republike Srpske predsjednik Zoran Škrebić i direktor Saša Ačić.

Održana sjednica UO Udruženja poslodavaca Kantona Sarajevo



Na sjednici Upravnog odbora Udruženja poslodavaca Kantona Sarajevo, održanoj 07. novembra 2024. godine, članovi su, između ostalog, zauzeli i stav povodom zahtjeva sindikata iz javnog sektora prema Vladi Kantona Sarajevo s ciljem povećanja osnovice zaposlenih u javnom sektoru od 01.01.2025. godine.

Članovi su naglasili da su o zahtjevima sindikata, nažalost, obaviješteni neformalni putem, odnosno iz medija, te da Upravni odbor Udruženja poslodavaca Kantona Sarajevo u osnovi svjesni situacije u kojoj se nalaze zaposleni i u javnom i u privatnom sektoru u Kantonu Sarajevo smatra da je potrebno razgovarati o povećanju plata u javnom sektoru i razumije zahtjeve predstavnika sindikata iz ovog sektora za povećanje osnovice, a time i ukupnih primanja svih zaposlenih u javnom sektoru Kantona Sarajevo. Sa druge strane, poslodavci iz realnog sektora osjećaju odgovornost da istovremeno i blagovremeno skrenu pažnju i na činjenice da je situacija u realnom sektoru više nego složena, nije došlo do smanjenja fiskalnih i parafiskalnih opterećenja u posljednje vrijeme naprotiv, ista su povećana. Također, inflacija, kriza na domaćem tržištu uzrokovana krizama u Europi i na Bliskom istoku već su ostavile ozbiljne posljedice na poslovanje u BiH, a novonastali problemi vezano za usklađivanje sa europskim politikama i praksama (transport, uvoz, izvoz, (ne)prilagodba CBAM i drugim politikama EU, najavljeno poskupljenje struje, i dr.) već su ozbiljno dodatno ugrozili poslovanje.

Ovakav nestimulativan poslovni ambijent uz brojne druge poteškoće poslodavcima u realnom

sektoru stvaraju ogromne probleme. Uzrokovano brojnim razlozima velika većina poslodavaca jedva pozitivno posluje i nema uslove za povećanje plata svojih zaposlenih.

Pored činjenice da nema fiskalnih rasterećenja, nije napravljen iskorak u dogovorenom smanjenju parafiskalnih opterećenja, a najavljuju se i nova administrativno finansijska opterećenja.

Nadalje je naglašeno da zdravstvena zaštita i zdravstveno osiguranje radnika nije izmijenjeno, odnosno obaveze poslodavaca prema sistemu osiguranja bolovanja i dalje su među najskupljim u Europi te da obrazovanje i dalje nije usklađeno sa potrebama tržišta rada, kao i da na reformama tržišta rada još uvijek nije ništa učinjeno. Socijalna davanja u Kantonu Sarajevo i Federaciji BiH rastu i s tim u vezi poslodavci osjećaju ozbiljan pritisak i očekivanja prema tim najugroženijim socijalnim kategorijama.

Zbog rasta plaća (najviše u javnom sektoru), rastu i prosječne plaće a ona je osnov i za određena davanja u socijalnom sektoru na nivou KS, a i FBiH, kao i osnov za određene obaveze u obrtničkoj i generalno u poslovnoj djelatnosti u FBiH.

UP KS nije prepoznalo neophodnu sinergiju na pitanjima pripreme potrebnih programa i projekata, a posebno Budžeta Kantona Sarajevo za 2025. godinu tako da izostaje i uloga Ekonomsko-socijalnog vijeća i drugih važnih stalnih ili ad hoc tijela u pripremi odgovarajućih rješenja od važnosti za rad i poslovanje.

Dopis sa stavovima ovo udruženje uputilo je Vladi KS i nadležnim ministarstvima sa zahtjevom za

održavanje tematske sjednice Vlade KS i Skupštine KS na kojoj bi se analizirali pobrojani aspekti i pripremili kvalitetni razvojni dokumenti i zakoni koji bi bili operativni već u 2025. godini.

Na sjednici je također razmatran i novi Nacrt Zakona o izmjenama i dopunama zakona o sudskim taksama Kantona Sarajevo koji predviđa brojna nova planirana opterećenja kroz povećanje taksu, kao što je na primjer kod takse za upis u sudski registar - osnivanje dijelova privrednog društva i drugih pravnih lica gdje su povećanja po tri ili šest puta u odnosu na trenutno važeći Zakon, ali i drugi iznosi taksu su značajno povećani.

Zaključeno je da će Udruženje reagovati po ovom pitanju.

Rukovodstvo UPFBiH prisustvovali svečanom otvaranju "GS-Rama"



Predsjednik i direktor UPFBiH Adnan Smailbegović i Mario Nenadić, prisustvovali su otvorenju nove fabrike "GS-Rama" u poslovnoj zoni Izlaz u Prozor-Rami.

Ova fabrika dio je velike poslovne grupacije GS-TMT iz Travnika, jedna od najznačajnijih kompanija u srednjoj Bosni, a koju vodi najuspješnija poduzetnica u našoj državi Snježana Kopruner.

Nova fabrika će raditi za njemačkog partnera Liebherr, ali, kako je Kopruner najavila već se i drugi veliki kupci bore za dolazak u Ramu.

Gradnja je započela polaganjem kamena temeljca krajem 2022. godine. Do sada je u prvu fazu izgradnje uloženo 20 miliona KM, a do kraja izgradnje investicija će iznositi 40 miliona KM. Trenutno radi 70 zaposlenika, a kroz nekoliko godina svoje radno mjesto moći će pronaći cca 250 ljudi.

Otvorenju je prisustvovalo veliki broj privrednika, radnika kompanije i predstavnika Općine, stanovništva Prozor-Rame.

U izuzetno svečanoj i optimističnoj atmosferi fabriku su otvorili vlasnica Snježana Kopruner, načelnik Općine Jozo Ivančević i predstavnik uposlenih u GS-Rama Jozo Jeličić.

Otvorene dvije fabrike u sedam dana



U prethodnih sedam dana, uspješni bh. poduzetnici, Petar Čorluka i Snježana Kopruner otvorili su dvije nove fabrike. Prošle sedmice, Čorluka je otvorio u Grudama, regionalno gledano, najmoderniju fabriku kartonske ambalaže Corspack koja će zapošljavati više od stotinu radnika. Jučer je Snježana Kopruner otvorila kompaniju "GS-Rama" u Prozor-Rami koja je odmah zaposlila 70 osoba, a u narednom periodu planira ukupno 250.

Kopruner i Čorluka sa svojim kompanijama, članice su upravljačkih i drugih tijela Udruženja poslodavaca u FBiH.

Predsjednik Upravnog odbora UPFBiH Adnan Smailbegović i direktor UPFBiH Mario Nenadić i ovim putem, u ime ukupnog članstva Udruženja i Upravnog odbora, s ponosom čestitaju vlasnicima novootvorenih kompanija gđi. Kopruner i gosp. Čorluki novi poslovni uspjeh i želimo puno sreće u budućem radu i poslovanju.